

扶南記

竺芝

(荔枝:[釋名]離枝[《綱目》]丹荔[蘇]頌曰:按朱應《扶南記》云:)

此木結實時,枝弱而蒂牢,不可摘取,必以刀斧斲取其枝,故與[以]為名。……

[《本草綱目》卷三一]

(《扶南記》:)

荔枝始傳於漢世,初惟出嶺南。

[《閩書》卷一五〇]

頓遜國

(《扶南記》曰:)

頓遜國,屬扶南,西出海中,國主名崑崙,有天竺胡五百家,兩佛圖,婆羅門千餘人。頓遜人敬奉其道,以香花自[洗],精進不捨晝夜。香有區撥摩花,冬夏不衰,日載數千車貨之,爇[燥]更香好。

[《藝文類聚》卷七六·內典上·內典]

頓遜國有酒樹,如安石榴,華汁停盃中,數日成酒,美而醉人。《博物記》:酒樹出典遜國,名椶酒。(出《扶南記》)

[《太平廣記》卷四〇六·酒樹]

林邑-扶南

(竺芝《扶南記》曰:)

扶南去林邑四千[里],水步道通。[檀和之]令軍入邑浦,據船官口城六里者也。自船官下,注大浦之東湖,大水連行,潮上西流,潮水日夜長七八尺。從此以西,朔望並潮,一上七日,水長丈六七。七日之後,日夜分為再潮,水長一二尺。春夏秋冬,厲然一限,高下定度,水無盈縮,是為海運,亦曰象水也,又兼象浦之名。]

[《水經注》卷三六]

(竺芝《扶南記》:)

山溪瀨中,謂之“究”。

[《水經注》卷三六]

越裳苑(《扶南記》:山溪瀨中曰苑。)

[《安南志略》卷一·水]



(竺芝《扶南記》：)

南方山溪間謂之“究”。[有西古郎究、金山郎究、越裳究、九德究、南陵究、文狼究、無勞究，又徵側走入金谿究。]

[《嶠南瑣記》卷上]

(竺芝《扶南記》：)

山谿瀨上謂之“宄”。

[《讀史方輿紀要》卷一一二]

林陽國

(竺芝《扶南記》曰：)

林楊國去金陳國，步道二千里，車馬行，無水道。舉國事佛。有一道人命過燒葬，燒之數千束樵，故坐火中，乃更著石室中，從來六十餘年，尸如故不朽。(竺枝目見之。)

[《水經注》卷一]

林那國

(竹芝《扶南記》曰：)

林那國蠻，其延國未多曰黎，與毗騫同，大洲放二萬里，法俗是同。

[《太平御覽》卷七九〇·四夷部一一·南蠻六·林那國]

頓遜國

(竺芝《扶南記》曰：)

頓遜國，屬扶南，國主名崑崙。國有天竺胡五百家，兩佛圖，天竺婆羅門千餘人。頓遜敬奉其道，嫁女與之，故多不去，唯讀天神經，以香花自洗，精進不捨晝夜。疾困便發願烏葬，歌舞送之邑外。有鳥啄食，餘骨作灰，甕盛沉海；鳥若不食，乃藍[籃]盛，火葬者投火，餘灰亟盛埋之，祭祠無年限。又酒樹，有似安石榴，取花與汗，停甕中數日，乃成酒，美而醉人。

(《太平御覽》卷七八八·四夷部九·南蠻四·頓遜國)

頓遜國有酒樹，如安石榴，華汁停甕中，數日成酒，美而醉人。

[《太平廣記》卷四〇六·草木一·酒樹]



毗騫國

(竺芝《扶南[史]紀》曰：)

毗騫國，去扶南八千里，在海中。國王身長三丈，頸長三尺，自古以來不死，知神聖未然之事。亦有子孫，子孫生死如常人，唯此王不死耳，號曰長頸王。食器皆純金。金如此間之石，無央[缺]限也。不聽妄取，有偷者，知則殺食之。長頸王亦能作天竺書，自道宿命所經，與佛語相似。作書可三千言，皆道是[世]事。其國法，有罪者共在王前食之，平常不噉人也。

[《太平御覽》卷七八八·四夷部九·南蠻四·毗騫國]

安息國

(竺枝《扶南記》曰：)

安息國去私訶條二萬里，國王臨海上。(即《漢書》天竺 安息國也，戶近百萬，最大國也。)

[《水經注》卷一]

扶南

(《外國傳》曰：)

扶南人若戶中亡器物者，即以米一升詣神廟，乞神見盜者，以米著神足下。明日取米，呼戶中奴婢，分令嚙之：盜者口中血出、米完不碎；不盜者入口即敗。從日南至徼外悉爾。

[《太平御覽》卷七八六·四夷部七·南蠻二·扶南國]

(《外國傳》又曰：)

扶南人最大居舍雕文刻鏤，好布施。多禽獸。王好獵，皆乘象，一去月餘日。

[《太平御覽》卷七八六·四夷部七·南蠻二·扶南國]